



Nuuk, 8. august 2014

UKA 2014/44

Inatsisartut Suleriaasianni § 33 naapertorlugu aalajangiiffisassatut siunnersuut imaattoq matumuuna saqqummiuppara:

Pisortat suliffeqarfinnut namminersortunut, tamatumani aamma aatsitassarsiornissamut kiisalu ingerlatassani annertuunut akuersissuteqaraangamik, pisortat sutigut tamatigut sulinermit immikkut piumasaqaatit ILO-mi isumaqatigiisummi 94¹-imi, pingaarnerusumillu art. 2-mi allassimasut, qulakkeersimasarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Naaja Nathanielsen, Inuit Ataqatigiit)

Tunggavilersuut

Suliffeqarfiit namminersortut pilersaarutiminnut pisortanit akuerineqartunut atatillugu isumaqatigiisummi nunarput ILO-mi isumaqatigiisummut 94-imut ilaatinneqaraluarpaaluunniit imaappoq tassani oqaasertaliussat malittariaqarnerannik paasineqassasut.

Suliffeqarfiit namminersortut isumaqatigiisutit atuuttut naapertorlugit sulisuminnik akissarsiatigut sulinermilu atugarisatigut piumasaqaatinik qulakkeerinninnissaminnik ullumikkut pituttugaanngillat. Tamassuma inooqataanermi appasinnerusutut inissisimatitsinissaq (social dumping) kingunerisinnaavaa, taamatullu sulisartoqarnerup sinneranut ajortumik tuniluusinnaalluni.

Taamaattumik suliffeqarfiit namminersortut akissarsiaqartitsisinnaanerannut atorfinitsitsisinnaanerannullu atatillugu atugassarititanik, Nunatsinni sulisartoqarnerup sinneranut allaanerusunik atuisinnaanerit pinaveersimatinniarumallugu erseqqilluinnartunik maleruagassaliortoqartariaqarpoq. Inuiaqatigiit aningaasaataat atorlugit pisortat sanaartorlutillu ingerlataqarniartillugit sulisartoqarnerup iluani nalinginnaasumik aningaasarsarsaritinneqartartut malinneqartarnissaat pillugit taamaammat erseqqissunik maleruagassaqartariaqarpoq.

Pisortanut aningaasatigut allaffissornikkullu kingunerisassat

Aningaasaliissutaareersut iluini suliasap naammassineqarsinnaanissaa ilimagineqarpoq.

Namminersorluni inuussutissarsiuteqarnermut aningaasatigut allaffissornikkullu kingunerisassat

Siunnersuutigineqartoq akuersissutigineqassagaluarpat takorloorneqarsinnaavoq ingerlatseqatigiiffiit aningaasartuutigiumaagassaat qaffassinnaassasut taamaalillutillu suliniutiginiakkat imminut akilersinnaanerit aamma ajornarnerulersinnaalluni, suliffeqarfiit sulisutik appasinnerusunik aningaasarsitinneqartarnissaat kiisalu sulisartunut sulinermit atugassarititaasut allat appasinnerutinneqarnissaat aamma naatsorsuutigisimagunikku.

Suliniutiginiakkalli piviusunngortinneqaraluarpata illuatungaartigut ilimagisariaqarpoq nunatta karsia A-mik akileraarutit amerlinerisigut isertitaqarnerulissasoq.

Sulisartoqarnerup iluani nalinginnaasumik atugassaritinneqartut maleqquneqartillugit suliniutiginiakkat imminut akilersinnaanerit ajornarsisinnaavoq, taamaalillunilu soorunalumi

¹ <https://www.retsinformation.dk/Forms/R0710.aspx?id=70061>

aamma unitsiinnartariaqalissallutik A-mik akileraarutit isertinneqanngitsoornerinik kinguneqartumik. Aningaasalli pineqartut nunatta karsianit isertissallugit siumoortumik missingersuusioneqareersimangillat.

Innuttaasunut aningaasatigut allaffissornikkullu kingunerisassat

Soqanngilaq